



國家清史編纂委員會・文獻叢刊

清代詩文集彙編

國家清史編纂委員會・文獻叢刊

清代詩文集彙編

《清代詩文集彙編》編纂委員會 編

上海古籍出版社

清代詩文集彙編 七六七

癯庵遺稿不分卷

陳啓泰撰

一

天弢閣詩鈔四卷

李寶翰撰

八七

寫禮廬遺箸五卷（文集一卷文集補遺一卷詩集一卷古書經眼錄一卷

讀碑記一卷）

王頌蔚撰

一三五

麻園遺集一卷

謝烺樞撰

二一九

慎齋文集十卷附年譜一卷慎齋別集四卷

趙舒翹撰

二四一

人境廬詩草十一卷

黃遵憲撰

五二五

日本雜事詩二卷

黃遵憲撰

六〇三

誰園詩鈔六卷

阮焱撰

六四一

味退居文集三卷味退居文外集二卷書牘存稿二卷蟬叟詩存一卷

黃世榮撰

七一七

宣統元年五月二十一日奉



上諭江蘇巡撫陳啓泰由翰林補授御史外任府道洊擢封圻
植品端嚴政聲卓著前因患病賞假俾資調理茲聞溘逝軫
恤殊深加恩著照巡撫例賜恤任內一切處分悉予開復應
得恤典該衙門察例具奏靈柩回籍時著沿途地方官妥爲
照料伊子江西試用同知陳繼鸞著以知府仍留原省補用
用示篤念蓋臣至意欽此

光緒帝陳公諱



錫
張介祉摹印

序

臥病申江載離寒暑曩歲服官五行省由淮而汴而吳一督三楚遂領畿臺所至接交省中僚采不下數十百輩盍簪之雅笙磬同音心所最折服者厥惟長沙陳伯屏中丞憶余丙午開府三吳中丞時由皖臬來綰蘇藩一見如舊相識蓋中丞以名翰林轉侍御史科第在余先余以兄事之而中丞執屬下禮惟謹談次悉湖南丁卯鄉試出蘄水畢東屏先生門下溯余乙亥鄉舉東屏先生適典黔試誼屬先後同門中丞貽余詩有惺籍同門判後先句蓋紀實也前官台諫曾上疏嚴彈某尙書直聲震畿甸繼劾雲南報銷舞弊案外而督撫內而樞部均干重譴奏牘尤騰誦海內舉朝爲之側目未幾一麾出守十載浮沈中丞澹然處之逮任監司洊升大府年華已垂垂老矣余由吳調蜀中丞適繼余任以不慊於同官某督屬下一二不肖之徒復迎合而媒孽之一切措施無從展布齎志以歿適余在鄂靈輿返湘時臨江一弔從此人天永隔河山亦異已忽忽三十年矣今夏中丞賢甥張君介祉以手集遺疏介何肖雅省長乞序於余披覽一過除奸而外舉凡裕國興學制夷防海諸要略一編之中三致意焉卷尾小令數十首尤妍雅可誦所惜已非全稿余與中丞交誼具詳舊作夢蕉亭筆記中茲不再述惟念乾坤既毀中丞目不覩鼎革身不居夷市天上騎箕甯非至幸獨余江湖老病草間偷活猶獲展誦斯編追維昔款竊不禁潄潄淚下也乙亥五月貴陽陳夔龍筱石氏序於海上花近樓時年七十有九

耀庵遺稿 何序 張序

序

長沙陳公伯平中丞光緒初與余同官京朝在翰林時文翰最著名及任臺諫風裁峻整彈劾不避權貴舉發雲南報銷一案直聲尤震朝右一麾出守十年不調積資洊歷封疆余守蘇州時公適開藩而至告余曰首府十年不調我是過來人君不必牢騷我輩爲官意初不在升官也彼石中丞升任鄂督公卽繼其任相處二年地方安靖情意交孚歡如在長安時也旋以衰疾薨於位余刊郡齋影事載其言論風采甚詳亮節清風無愧千古矣余又於話夢集中仿杜工部八哀之例作一詩哀之懷賢之意重于報知己也今張君介祉携公奏疏詞稿將付諸剞劂而問序於余竊維公當日奏稿其見諸邸抄者膾炙人口余亦耳熟能詳其餘條陳時政風聞言事各抒意見凡留中未發者余亦不敢妄加議論惟倚聲諸作昇平雅頌藹然元音不期於垂盡之年得飽聆之不禁爲之一快且尤喜張君淵源家學篤念渭陽之親爲之導揚盛美益令人敬服無已也乙亥立夏古閩何剛德識於平齋

序

余弱冠宦湘蚤聞陳伯平中丞居臺諫日疏劾權貴事卽欽慕其人後官京師獲交中丞詰嗣養直太守公度觀警道威郎中昆仲修五族叔亦來遊都下時相過從然於中丞之撰箸固未嘗一覩也今春遇叔於海上出其所輯中丞公奏稿及小詞數十闕命爲校勘籌貲付

梓且以中丞遺稿已多散佚惟此吉光片羽彌堪珍惜亟欲廣布以免就湮乃先將詞稿屬余妻弟梁衆異刊登青鶴雜誌（已見本年六月十六七月十六兩期）并乞袁君帥南選入湖南詞鈔叔近又得友人之助爲之印行可謂有志竟成矣叔生有至性見義勇爲曩嘗刻蔡忠烈詹忠節諸集表章先哲叔此舉不獨足報舅氏之恩亦卽蒐存文獻之素志也余適將北上爰綴數言以歸之時乙亥仲夏張超南蟹蘆書於滬江旅次

題詞

長沙治術傳三策楚澤忠言託九歌賴有陽元能輯佚外家文獻已無多

疏劾三公世所賢晚傷驥鼠竟沈泉追論朝政參詞旨腸斷光宣四十年（伯平中丞以劾蔡乃煌憤悒卒官王湘綺輓之有抗疏劾三公晚傷驥鼠千鈞弩語一時傳誦）修五先生姻長刻伯平中丞奏議及詞 先生中丞出也敬題二絕

乙亥五月梁鴻志衆異拜稿

猶有光芒護六丁悅從紙尾展遺型詞華不薄柳三變（帥工詞獨嗜痴余作以其愛遊嘗舉伎家醺葬柳七事爲諷殷望有如子弟）諫草誰如張九齡（帥早列諫垣直聲震朝右及長外臺百僚嚴憚風采）愁病星星憂國死病眸炯炯向人青（病榻猶蒙溫誨）廿年畜志身能見狂喜看天復涕零（久欲掇拾遺文張以佳傳而迄未果）

宏獎眞如席上珍衣裳曾擅主家春（用后山妾薄命詩意）更尋趙土知無地莫報荊州

癭庵遺稿 題詞

四

愧有身湘水斷墳悲宿草（帥歸葬湘江擬展其墓以道遠未果至今耿耿）戟門殘角愴前塵（亂後佐幕數居撫署）東南文采傾當日頭白江湖賸幾人（同幕舊人惟熊秉三夏劍丞二老在滬）

病與羣昏作老讎孤根無計掃蚍蜉輦金駟僧窺兵柄奪節途人識鬼謀（某藩欲以陳德龍爲協統見阻於帥昌言必奪撫座）丹旄臨江悲大鳥覆巢射影及閒鷗（某藩既升任以治遊爲辭褫余同里稅務停委三年）刑天他日看羣舞家祭聞翁亦少休（帥爲督藩滬道三方傾軋憂憤而逝後某某等皆於粵蜀被難不保首領）

平生恨未識賢曇（刻集者爲帥宅相張君）酒淚如潮尺集戡善本人間應萬紙清流天上許同龕峴碑誰不思羊祜楚望猶當食伍叅（辛亥之變國人集矢某督）箕尾有靈如念我爲憐棠拜尙江南

癭庵撫卹遺集刊行敬跋長句

侯官林黻楨肖輪初稿

癭庵遺稿

長沙陳啓泰伯平

甥張介祉修五校印

■劾吏部尙書萬青藜摺

奏爲特參辜恩怙惡。執法徇私之大員。請旨立予罷斥。以肅綱紀而樹風聲。恭摺仰祈 聖鑒事。竊臣伏讀十月二十五日 上諭。本年又屆京察之期。各部院堂官均受國厚恩。務當精白乃心。秉公考核等因。欽此。仰見 朝廷慎重察典。澄叙官方之至意。欽服莫名。臣思舉劾司員。其權分操於堂官。其事則總匯於吏部。今吏部漢尙書非他。卽 諭旨所謂衆望不孚之萬青藜也。該尙書貪劣款蹟。屢次被人參奏。久在 聖明洞鑒之中。前次開去兼尹。開去掌院。而不遽予黜罷者。原欲曲全其體面。俾以部務自効。稍贖前愆。聖恩寬大至矣。盡矣。誠不意萬青藜不惟不知愧感。且反倖寬典之可以屢邀。而部務乃日益弛壞也。近數月來。銘安以鍾彥一案。李鴻章以李秉衡一案。皆瀝情陳訴於 聖主之前。部中雖牽合例文。飾辭謝過。而司員之妄肆詆誣。書吏之勒索規費。則皆確而有徵。各部公事多係正堂主持。萬青藜更事多而掌銓久。豈應聾瞶至此。然猶可諉之曰。司員書吏也。今年秋間。兵部出有題缺。郎中一缺。應以題缺丁憂服闋之鄧天符擬補。萬青藜以其壻李邦楨係兵部候補員外郎。急於得缺。爲 京察保送一等地步。若准鄧天符補郎中。則員外一時不能推升。出缺遂授意司員。妄稱鄧天符不合新章。不應擬補。迨經兵部引案駁回。萬青藜猶思巧辯遷延。

不覆。各堂官爭之不得。適其時又出郎中一缺。員外題升後。季邦楨有缺可補。萬青藜始抽出一稿。援案照准。夫部章理應畫一。如其應准。則前之議駁者何心。如其應駁。則後之照准者何意。且聞鄧天符補郎中。咨覆遲至兩月有餘。季邦楨補員外。咨覆不過數日。似此前後兩歧。遲速任意。徇私舞弊。悍然不顧。宜其同官鄙惡。物議沸騰。堂官如此。何責乎司員。又何責乎書吏。無怪外間謂吏部銓補處分。皆可上下其手也。臣伏讀本年六月十六日諭旨。朝廷進退大臣。惟視其能否稱職。以爲考核。今萬青藜不稱兼尹。不稱掌院。久爲公論不容幸荷。聖慈不加深究。宜如何小心勤職。力戒前非。當竭誠乞骸。避賢者路。乃竟辜恩溺職。飭法徇私。是直視聖旨爲具文。等部務爲兒戲。吏部爲六官之長。若使久尸其位。何以肅銓政而儆官邪。現當聖朝勵精圖治。認真察典之時。臣知如萬青藜者。必在甄別黜休之列。然既劣跡昭著。莫若早賜罷斥。使各部院堂官皆知所儆畏。則京察舉劾。或亦不敢於背公而徇私。所關實非淺鮮。臣職司糾劾。不敢稍避嫌怨。披瀝上陳。伏乞皇太后皇上聖鑒訓示。謹奏。

請仿閩省考試官員片

再各省請停分發。誠有見於冗員之多。甚妨吏治。賢否混淆。日形壅滯。以致奔競成風。廉恥道塞。一缺出而謀幹者數十員。一局開而求差者百餘輩。未得則汲汲鑽營。既得則孜孜爲利。雖人心之不公。亦積弊之勢使然也。近見閩省奏准考試章程。以酌留四五成爲率。遵奉部章。破除錮習。察吏之道。莫善於此。使各省盡如此辦理。方可責疆吏以廓清仕途。振興吏

治之效。應請 申諭各督撫。於考試人員。倣照閩省辦法。各按該省人數。或留二去八。或留三去七。至寬亦以四五成爲定。破除情面。分別去取。無稍寬濫。旌別旣嚴。人爭自勵。亦不必輒以停止分發爲請矣。是否有當。謹附片陳明。伏乞 聖鑒。謹奏。

■條陳興利除弊事宜摺

奏爲條陳興利除弊事宜。以裕度支而籌至計。恭摺仰祈 聖鑒事。竊維爲政之道。在用人尤貴理財。欲強兵必先富國。蓋國之有財。如燈之有膏。魚之有水。農之有田。燈無膏則熄。魚無水則薨。農無田則飢。自然之理也。而拘儒不達。介介而爭。率以言利爲病。不知各國通商以來。島船夷厘。徧佈會要。得尺得寸。抵隙蹈瑕。無微不至。無孔不入。我中國已成漏卮。坐視不可補苴。不能更數十年後。元氣日以耗。民生日以蹙。國用日以竭。而始敝敝然求理財之術。不已晚乎。且中國非無財也。無盡之藏。不事經營。終爲棄地之貨。已決之防。不爲挽救。幾同竭澤之漁。源旣未開。流尤不節。弊且日滋。致令自強之計。以匱乏而中阻。大利所在。以牽玩而不行。此臣所爲憂憤籌思。而不能自己者也。謹就愚慮所得。爲我 皇太后 皇上條悉陳之。

一重征洋藥。夫洋藥之蠹中國久矣。卽每歲進口收稅徵之。則民間消耗之數可知。况偷越之貨。幾與報數將摺暗漏尤爲不少。今不思設法禁止吸食。而但以不種罌粟爲長策。是益其薪而助之燄也。近日朝鮮與英美立約。獨嚴鴉片之禁。尙能自固藩籬。中國美巴新約。亦禁彼此不得販賣。將來英國換約。能否挽回此局。雖難預料。然朝鮮猶能拒之。中國豈可不

思自立。况有美巴新約可據。杜絕當自不難。至補救目前。惟有重征釐稅一法。既可稍懲頹風。亦以藉充國帑。查通商善後條約第五款。原有洋藥如何征稅。聽憑中國辦理之條。洋人自不得阻撓其事。上年左宗棠議加每箱銀八十兩。尙未明見施行。然臣愚猶以爲太少。內地釐金。似亦可加倍抽收。價倍則吸食自少。銷滯則販賣亦稀。實爲釜底抽薪之計。應請飭下議行。以爲他日更張之本。卽勢難禁絕。每歲驟增千餘萬餉。需不爲無益。

一彙售絲茶。通商出口貨物。以絲茶爲大宗。洋商狡詐百端。每歲新貨到埠之時。始則餌以厚值。迨聞風者踵至。則把持包攬。勒指多方。貨愈積而愈多。價愈抑而愈賤。華商業者。折閱甚多。元氣大傷。甚非中國之福。計每年出口進口銀數。中國惟恃絲茶兩項。稍敵外洋百貨三分之一。而洋藥數千萬兩之數。不與焉。並此而不能設法維持。將成坐困之勢。臣愚以爲設立絲茶公局。招商集股。資本不足。借給帑項。絲茶歸局收買。彙售外洋。入價劃一定之章。出價酌數分之息。務使商人得沾餘潤。免墮洋商狡計之中。則華人生理。消耗無虞。公局子母兼權。亦可坐收利益。但此事得人斯理。應請飭下南北洋大臣。籌議開辦。嚴定規條。簡派廉能素著之員。妥爲經理。以杜弊混。而裕經費。

一廣織呢布。民間布帛之用。通商以來。各國呢布。充滿寰中。上自搢紳。下至齊民。罔不購用。歲計糜費金錢。難以數計。外洋獨擅其利。豈容久作袖手之觀。左宗棠前在甘省。購辦機器織呢。甚有成効。布匹所需更切。推廣行之。尤屬便民。聞漢口上海等處。商人屢議興辦織布公司。以需款過多。中止。可否飭下通商各省督撫。籌開公局。招商借帑。廣織呢布。以濟民用。

而收利權。其有自願辦機器開織者聽之。總期愈推愈廣。俾銀錢常流通于內地。不至暗漏外洋。似於國計民生均有裨益。

一擴充礦務。天生五材。民並用之。礦洞之開。利源尤鉅。從前雲南礦廠最盛。兵燹以後。置未經理。其他各省礦坑亦久經封閉。新疆開辦以來。未曾發洩。礦苗尤旺。坐視此自然之利。棄同泥砂。殊屬可惜。近年李鴻章奏辦開平煤礦。創之於先。平泉長樂等處銅礦亦相繼興辦。取多用廣。應請各省推廣行之。商辦官辦各視所宜。明定章程。總期有利無弊。庶幾天地無盡之利。罔非國家歲入之需矣。

一改運官鹽。兩淮鹽務甲於天下。然利歸於商。徒使禹筴起家。豪賞競侈。司農仰屋。帑藏仍虛。丁寶楨將川鹽變通辦理。改商歸官。任怨任勞。卒著成效。今以兩淮而論。道光十一年前督臣陶澍於淮北酌運官鹽。或暢岸官鹽有缺。或滯岸票鹽不到。卽委員載運濟售。是官運曾試行於淮北。今年左宗棠奏請收復引地。委員運鹽前赴湖北荊州監利漸入試銷。是官運又將行於淮南。惟頒給新商票張並不循例驗資配簽掣發。繳捐數目亦未奏明。以致一二奸猾之徒。包攬射利。物議頗多。辦理殊未盡善。臣愚謂宜趁此事機。將新增之引一律改歸官運。擲還捐項。令將引票繳銷。以杜奸計。而肅鹺政。且免川淮交訐。鄂省官吏久戀腥羶。台諫部員利其賄潤。左宗棠力主復淮之議。授奸商居奇之柄。何如籌國帑不竭之源。丁寶楨庇護川商。利在公家。亦不敢任其充斥浸灌。是官運行而淮岸自復。餉項自增。應請飭諭妥議章程。垂諸久遠。果能實力奉行。釐課而外。歲入當不下數百萬。若再推廣行之。所增

更鉅。是亦會計之臣。當爲籌及者也。

一酌裁制兵。綠營兵將。碁布星羅。養兵之需。歲幾二十萬。山澤之儒。嘗有養士不如養兵之歎。然使無事。能資彈壓。有事。可期捍禦。在國家原不宜吝惜此款。乃自髮捻跳梁。莫不棄甲倒戈。聞風驚潰。遂使中原糜爛。江左逋逃。今事平之後。猶復久仍舊制。虛糜鉅項。莫此爲甚。各省練軍。雖稍變通辦理。而額旣不裁。餉仍未減。應請飭議。量裁塘汛。並沙汰都守以下各弁。就原額酌留四五成。以裨實用。而免虛耗。

一清釐關稅。國家正供。田賦而外。關稅實爲大宗。任其事者。莫不垂橐而往。滿載而歸。如果涓滴歸公。歲入奚止十倍。前次欽奉明諭。飭查侵蝕。近見穆圖善復奏。仍不過掩飾迴護。他處可知。此事令其自陳。誰肯居貪婪蔽混之名。致干重咎。勢不能和盤託出。明矣。臣愚以爲各海關。暨稅務較重之處。宜簡派廉潔剛正。破除情面之大員。監收一年。或本省督撫。廉潔著聞者。亦可令其兼辦。則歷任弊端。可期水落石出。然後酌加解額。以裕帑項。皇上原有務存寬大。不追旣往之諭。無所容其瞻顧。弊竇一清。餉需自形充足矣。

一慎重庫儲。財用盈絀。恆視有無。侵冒爲衡。官吏不能弊絕風清。而欲款項之無虛糜。未之有也。內府浮銷。勢成積重。戶部銀庫銅局。暨派辦處司員書吏。又皆通同舞弊。勒索侵漁。軍需銷案。尤駭聽聞。外職京員。朋分夥竊。動輒百萬。或數十萬。夫此私家中飽之物。何一非天府帑藏之需。疆吏以之行賄。劣員據爲利藪。朝綱國計。大有所關。理應立法稽查。廓清積弊。戶部派辦處名目。似可議裁。嗣後各省報銷到部。臨期酌派一二廉幹司員核辦。並不准本

司官吏預聞。以杜染指。如所派不得其人。贓款發覺。即將該堂官照私罪議處。庶可稍示懲儆。各處工程。浮冒亦重。節省銀兩。仍當提出歸公。應請飭下內務府戶工二部。暨管庫大臣。嚴定章程。以禁貪饕。而重庫款。以上各節。或未經議及。或議而未行。或行而未盡。若果決然爲之。府庫何患不充。財用何患不足。然更有事屬創舉。人懷疑慮。處今日之勢。不能不亟籌試辦者。則修鐵路是也。通商各國。莫不由有鐵甲船。而兵強。有火輪。而國富。中國相形見絀。宜其環而相侮。莫可如何。夫知己知彼。與師其長技而制之。皆兵家上策。前年劉銘傳奏請試辦鐵路。經李鴻章條陳。大利九端。甚爲詳盡。嗣以紛紛異論。遂格不用。不知鐵路若成。征調轉輸。貨運文報之捷。在在均收實用。先辦清江至京一路。逐漸推廣。利賴無窮。清江一路。旣開。則江廣轉漕之費。無事開支。且鐵路告成。河工亦緩。並可裁撤河漕兩督。及所屬廳員弁兵數千人。歲費尤省。異議者。無非以需款太鉅。值此帑項支絀。與舉爲難。若臣所陳各節可行。何愁此款難集。并不必籌借洋債。致滋盤剝之虞。查同治六年。特旨起復前督臣沈葆楨。總理船政。維時船政係屬創舉。沈葆楨一意孤行。不爲浮議所動。不數年間。前後造成兵輪數十艘。論者謂海上用兵以來。惟此舉差強人意。今鐵路之利。更可以濟輪船之窮。尤爲有益。無損。應請飭下李鴻章妥議興修。主持至計。庶幾利藪闢而餉源裕。餉源裕而兵力強。必能裨益聖朝。誅鋤強敵。乃者倭熾于東。法擾于南。兩地邊藩。悲生旄葛。此外四方。莫不眈眈虎視。伺便乘虛。夫我朝以神武定天下。兵威之盛。曠古無儔。今頗靡然不振者。良由度支竭蹶。遠略難勤。如其奮發有爲。原不難震懾殊俗。臣感懷事勢。憤懣百端。勉竭愚誠。敬摺管

耀庵遺稿

八

見。倘荷 聖慈採納。飭議施行。時局幸甚。是否有當。伏乞 皇太后 皇上聖鑒。謹奏。

籌擬海防摺

奏爲籌擬海防六條以制島夷而張國勢。恭摺仰祈 聖鑒事。竊維勤遠略者。不務苟安。舉大事者。不惜小費。泰西各國互市。旣已據我心腹。吸我脂膏。挾制要求。有加無已。日本逼處東土。近更驕橫。怙恃西人。憑陵中國。則海防要務。宜加意講求。亟爲未雨之綢繆。方免臨時之遲誤。自不得以紛紛異論。撓我局中定見也。夫有備可以無患。先發乃能制人。當事諸臣。審慎遲迴。意恐重開邊釁。不知國威愈損。卽敵勢愈張。在我苟存得過且過之心。在彼必存得步進步之想。與其委蛇從事。俯仰一聽諸人。何如發憤爲雄。操縱得專於己。北洋近設水師。已有端緒。然沿海措置。尙待擴充。謹就管見。擬上六條。伏候 採納。

一添製船械。西洋各國橫行海上。無非恃其鐵甲之多。火器之利。東洋叢爾島邦。亦頗振作。有爲仿效。西法節次添造戰船。狡焉思逞。中國相形見絀。屢爲所侮。恥莫大焉。同治十三年。沈葆楨議購鐵甲兩艘。是爲中國兵輪之始。近年李鴻章陸續添辦。其堅利可涉重洋。足資戰守者。不過數船。沿海萬餘里。實不足敷分布。臣愚以爲創建海軍。最爲當務之急。然規模太小。適爲他族所輕。就中國目前之勢論之。鐵甲戰船。頭等者七號。斷不可少。二等宜備十四號。三等宜備二十八號。其餘木質兵船。亦需三十餘號。分駐各省海口。並抽派數船。南至越南。北至朝鮮。來往梭巡。以資保護。但自行製造。竣事需時。自當分派熟悉廉幹委員。前往英法美德丹諸國船廠定造。各處使臣。諒皆探討有素。木質之堅。鐵甲之厚薄。機器之新。